

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 14, No. 432

原始資料: 蕭鎮國大德提供, 維習安大德提供之高麗藏 CD 經文, 閩學新大德輸入 / Gamblers 大德校對, 北美某大德提供, Jasmine 提供新式標點

No. 432

佛說十吉祥經

失譯人名今附秦錄

如是我聞：

一時，佛在羅閱祇耆闍崛山中，與大比丘眾千二百五十人、菩薩五千人俱。

爾時，世尊與無央數百千人，前後圍遶而為說經。

時大會中有一大士，名離垢蓋，承佛威神，即從座起，偏袒右肩，右膝著地，叉手合掌，前白佛言：「今可現有諸佛世尊如來．至真．等正覺，若有善男子、善女人求佛道者，聞其名號受持讀誦，疾得不退轉於無上正真道？」

佛告離垢蓋太士：「善哉！善哉！族姓子乃能作是問，多所利益。

「有，族姓子！東方去此度一恒沙數諸佛世界，有世界名方莊嚴，其剎有佛，名大光耀如來．至真．等正覺，今現在說法。

「復有，族姓子！東方度二恒沙數諸佛世界，有世界名諦勝諸勝，其剎有佛，名慧燈明如來。有世界名金剛，其剎有佛，名大雄如來。有世界名淨尊住，其剎有佛，名無垢塵如來。有世界名金光明，其剎有佛，名上像幢十蓋王如來。有世界名大威神，其剎有佛，名威神自在王如來。有世界名香熏，其剎有佛，名極受上影王如來。有世界名寶嚴，其剎有佛，名內寶如來。有世界名海燈明，其剎有佛，名大海如來。有世界名十力燈明，其剎有佛，名十力現如來。當知，離垢蓋！若善男子、善女人求佛道者，恒邊沙剎滿中七寶持用布施如來．正覺，若善男子、善女人，聞此佛名受持誦誦執在心懷，於大眾中為人廣說，此之功德過前功德。」

重欲解義，而說偈言：

「如恒邊沙，諸佛世界，滿中七寶，
持用布施，若有得聞，諸佛名號，
信樂不忘，功德過前。

「若聞諸佛名，諷誦莫忘失，
其人不疑，言我不成佛。
六通無窮盡，至于無數劫，
其身當金色，相好以莊嚴。
若持佛名號，過於十億劫，

疾得成正覺。」

佛說經竟，離垢蓋大士、諸菩薩等，天龍、鬼神及世間人，咸皆歡喜頂受佛教。

佛說十吉祥經